

四庫全書

經部

欽定四庫全書

春秋大全卷二

明 胡廣等 撰

隱公中

辛平王五十
酉一年崩

三年

齊僖十一 晉鄂四 衛桓十五 蔡宣三十 鄭莊二十四 曹桓三十七 陳桓二

十五 杞武三十一 宋穆九 卒
秦文四十六 楚武二十一

春王二月

程子曰月王月也事在二月則書王二月在三月則書王三月無事則書時書首月蓋有事則道在事無事則

存天時正王朔天時備則歲功成王道存則人理立春
秋之大義也臨川吳氏曰每歲春之下書月必加王字
以見此月數乃時王之所改定王氏曰春秋書王正月
者九十三書王二月者二十三書王三月者十九皆於
歲首係王著周王之正朔以明大一統之義或歲首所
書事舊史止書時或例當書時則二月三月皆不書王
如隱八年書遇垂三月歸祊襄十五年書春向戌聘二
月盟文九年書春毛伯求金二月得臣如京三月夫人
至之類是也何體乃謂二月殷之正月三月夏之正月
王者存二王之後使統其正朔其說謬甚當周之世而
存夏殷之正朔豈所謂大一統耶
天無二日民無二王之義安在邪

己巳日有食之

公羊傳何以書記異也日食則曷為或日或不日或言
朔或不言朔曰某月某日朔日有食之者食正朔也其

或日或不日或失之前或失之後失之前者朔在前也失之後者朔在後也穀梁傳言日不言朔食晦日也其日有食之何也吐者外壤食者內壤闕然不見其壤有食之者也有內辭也或外辭也有食之者內於日也其不言食之者何也知其不可知也程子曰日食有定數聖人必書者蓋欲人君因此恐懼脩省如治世而有此變則不能為災亂世則為災矣人氣血盛遇寒暑邪穢不能為害其氣血衰則為害必矣又曰日有食之有食之者也更不推求何者也太陽君也而被侵食君道所忌然有常度災而非異也星辰陵亂亦然何氏曰不言月食之者其形不可得而覩也

經書日食三十六去之十有餘歲而精厯算者所能考也其行有常度矣然每食必書示後世治厯明時

之法也

朱子曰歷法周天三百六十五度四分之

一度日月皆右行於天一晝一夜則其行一周而又過
十三度十九分度之七故日一歲而一周天月二十
七日有奇而一周天又二日半逐及於日而與之會
一歲凡十二會方會則月光都盡而為晦已會則月
光復蘇而為朔晦朔而日月之合東西同度南北同
道則月揜日而日為之食是皆有常度矣然王者脩
德行政用賢去奸能使陽盛足以勝陰陰衰不能侵
陽則日月之行雖或當食而月常避日故其遲速高
下必有參差而不正相合者所以當食而不食也若
國無政則當食必食雖曰行有常度而實為非常之
變矣故春秋日食必書杜氏曰日月動物雖行度有
常然不能不小有盈縮故有雖交會而不食者或有
頻交而食者家氏曰日月行天各自有道雖云朔相
遇而道有表裏若月光在裏依限而食者多若日光

在表雖依限而食者少自漢以來歷家每以百七十
有三日為一交會未有頻月交會者而襄二十一年
九月十月二十四年七月八月頻月頻食漢高祖即
位之三年十月十一月頻食以後至今千有餘年未
有頻月頻食者故知天度有時而變其常茲所以為
異也張氏曰於歷應食而春秋不書者尚多則日食
必在交限其入限者不必盡食若過至未分月或變
行以避之或五星潛在日下禦晦以救之或涉交數
淺或在陽歷陽盛陰微則不食或德之休明而有小
青焉則天為之隱雖交而不食此四者德之所生也
則災之所生乃德之不脩也明矣

有常度則災而非異矣然每食必

書示後世遇災而懼之意也

龜山楊氏曰日之盈虧有數在焉此故歷者所

知也何與於人事而先王為之恐懼脩省者謹天戒而已蓋於其常也實錢出納敬致其至所以若天道

扶民事尤重於此則其有變也可不為之警戒乎故春秋日食必書之所以重其變也然或言朔或言日或不言朔日或朔日並書之史失之詳畧異也日者衆陽之宗人君之表而

有食之災咎象也克謹天戒則雖有其象而無其應

弗克畏天災咎之來必矣凡經所書者或妾婦乘其

夫

何氏曰桓十七年日食有夫人譖公使齊侯誘而殺之之應莊十八年日食有夫人如莒淫泆不制

之應三十年日食有夫人淫亂通于二叔殺二嗣子之應

或臣子背君父

汪氏曰是年日

食有衛州吁弑君公子翬專兵權之應桓三年日食既有鄭拒王師之應莊二十五年二十六年日食有慶父叔牙專權淫恣將謀篡弑之應僖五年日食有晉里克弑二君之應文元年日食有楚世子商臣弑

君之應十五年日食有宋弑杵臼齊弑商人宣公弑
赤莒弑庶其之應成十七年日食有晉弑州蒲之應
襄十四年日食有衛孫甯逐君之應二十四年日食
既有齊崔杼衛甯喜弑君之應二十七年日食有閭
弑吳子蔡般弑父莒人弑君之應昭七年日食有楚
弑君虛之應十五年十七年日食有意如專恣許弑
君買之應二十一年二十二年日食有子朝篡奪周
分為二天下兩主之應二十四年日食有意如逐君
吳弑僚之應定十二年日食有薛弑君比晉荀寅士
吉射叛之應十五年日食有盜殺蔡侯齊陳乞弑君
之應

或政權在臣下

汪氏曰宣十七年日食有四國大
夫敗齊于鞏君道微臣道強之應

襄十五年日食有溴梁之盟政在大夫之應二十一
年二十三年再日食有溴梁宋臣恣日甚凡大盟會
征伐皆大夫為之二慶專陳晉欒盈叛逆之應昭三
十二年日食有昭公客死晉大夫專執入于京師之

應定五年日食有陪臣強橫

或外裔侵中夏

汪氏曰桓三年

魯失國寶宋大夫叛之應
日食既有楚滅穀鄧上僭稱王之應莊十八年日食
有戎來濟西之應三十年日食有狄滅衛之應僖五
年日食有狄伐晉滅溫之應十二年日食有楚滅黃
狄侵衛之應十五年日食有秦獲晉侯楚執宋公中
國微弱之應文元年日食有楚滅江六狄北侵列國
之應宣八年十年日食有楚莊圍宋析骸易子伐鄭
勝晉鄭伯肉袒晉大敗于邲之應成十六年日食有
楚滅舒庸之應襄二十三年日食有楚滅舒鳩之應
昭七年日食有楚滅陳之應二十
四年日食有吳滅巢滅徐之應

皆陽微陰盛之證

也是故十月之交詩人以刺日有食之春秋必書以

戒人君不可忽天象也

茅堂胡氏曰春秋正人主心術之大法也故不書祥瑞而

災異則書譬諸疾疫天時之戾氣也知其可畏而加慎焉則免夫培擊之患矣肆行陵犯無所忌憚適足以速殺其身矣君子見物之有失常者必恐懼脩省而不敢忽况日者衆陽之宗至尊之象乎日有食之春秋所以存而弗削也然災與異不同日有食之常度也故程氏以為災而先儒以為異春秋日食三十六精歷算者得之幾盡其有常度審矣謂之異非也惟有常度則數不可免然或食於朔或食於夜或食於前或食於後或當食而有陰雲之祥此則人為所感之不同者也故春秋或書日或書朔或書日不書朔或書朔不書日或曰朔皆不書或書日有食之既者於以見雖常度不可免而為人所感之不同如此則其應亦隨之不可專歸之數而為恐懼脩省以答天災矣又况地震山崩水旱虫類物怪之變本非常度者乎隱公九年大震電繼以大雨雪而有鐘巫之難晉惠公時河上沙鹿崩而有韓之獲宋襄公時

五石隕六鷁退飛而有孟之執成公十六年雨水冰是秋君衾而季孫有莒丘之舍昭公二十五年鸛鷁來巢未幾昭孫于齊公子宋得國其應如影響不可誣也

三月庚戌天王崩

左傳三月壬戌平王崩赴以庚戌故書之公羊傳何以不書葬天子記崩不記葬必其時也諸侯記卒記葬有天子存不得必其時也曷為或言崩或言薨天子曰崩諸侯曰薨大夫曰卒士曰不祿穀梁傳高曰崩厚曰崩尊曰崩天子之崩以尊也其崩之何也以其存民上故崩之其不名何也大上故不名也程子曰崩者上墜之形四海之內皆當奔赴魯君不往惡極罪大不可勝誅不書而自見也

崩者上墜之形春秋歷十有二王

汪氏曰春秋歷十有四王悼王立未

踰年敬王崩在春秋後故止曰十二王

桓襄匡簡景志崩志葬者赴告

及魯往會之也

王氏曰叔孫得臣葬襄王叔鞅葬景王桓匡簡之葬非卿會不書其人亦

見禮意之厚薄

平惠定靈志崩不志葬者赴告雖及魯不會

也

趙氏曰不會則不書志不臣也記是以著非也

莊僖頃崩葬皆不志者王

室不告魯亦不往也

趙氏曰王室不告魯不赴也哀王室之無人著諸侯之不臣也

諸侯為天王服斬衰

音崔儀禮諸侯為天子斬衰傳曰天子至尊也

禮當以

所聞先後而奔喪今平王崩周人來訃而隱公不往

是無君也其罪應誅不書而自見矣

張氏曰天子崩不書名至尊異

於諸侯也喪服斬衰裳直經杖絞帶冠繩纓管屨三年諸侯為天子之禮也天王之喪同軌畢至為臣子者以所聞先後奔喪禮也隱公聞喪而不奔春秋以來送終之禮薄矣聖經詳志以見罪惡之淺深今此平王之崩但書來計而魯人不往且忘武氏子之求賻則隱公之蔑視五十一年天下之共主闕其弔葬無復臣子哀戚之情邈然不以動其心而自同於禽獸則其惡極罪大不可勝誅不待貶絕而自見矣○龜山楊氏曰王崩國之大事故書之不書葬魯不會葬故也新王即位不書魯不朝也蓋以書考之則王既尸天子二伯各帥諸侯入應門左右禮也魯之不朝則諸侯之不臣可知矣汪氏曰秦昭襄王薨韓桓惠王衰經入弔同春秋諸侯之事天子不若戰國之君事大國之禮也

或曰萬國至衆

也封疆至重也天王之喪不得越境以奔而脩服於

國卿供弔送之禮訖葬卒哭而除喪禮乎按周書康王之誥大保率西方諸侯入應門左畢公率東方諸侯入應門右再拜趨出王反喪服此奔成王之喪者安得以為脩服於國而可乎

汪氏曰或謂康王之誥所稱諸侯指畿內諸侯

而言今考書文曰敢執執壤莫則各執壤地所出之物以為奠贄而非禮執贄之謂也曰庶邦侯甸男衛則為五服諸侯而非王臣食采於畿內者也是時成王始崩同軌諸侯雖不能盡至蓋召公畢公但率諸侯之已至者故周人有喪魯人有喪周人往弔謂使

以受顧命耳

人可也魯人不往謂當親之者而不可使人代也諸

侯歲時或朝覲於京師

汪氏曰成十三年三月公如京師七月公至莊二十二年

公如齊二十三年春公至文三年公如晉四年春公至十三年冬公如晉十四年正月公至成十年七月公如晉葬景公十一年三月公至襄四年冬公如晉五年春公至十二年冬公如晉十三年春公至二十年十一月公如楚二十九年葬楚康王五月公至昭十五年冬公如晉十六年夏公至又按此傳當有或交好於大國一句恐誤漏也

或會同於方嶽

汪氏曰僖十六年冬會淮十七年九月公

至宣七年冬會黑壤八年春公至成五年十二月同盟申牢六年正月公至襄二十一年冬會商任二十二年正月公至

或從兵革征討之事

汪氏曰莊五年冬會伐衛六年秋公至僖二十

八年冬會圍許二十九年春公至襄十八年十月會圍齊十九年正月公至

越境踰時不

以為難何獨難於奔喪而薄君臣始終存歿之義哉

大非先王之禮失春秋之義矣

茅堂胡氏曰崩薨卒大變也不可以為常

或崩或不崩或地或不地或卒或不卒或葬或不葬或赴而往或赴而不往或往而書或往而不書於以見誅亂臣賊子撥亂世反之正之意其義大矣如隱三年書天王崩王臣求賻之事即見公不奔喪不會葬之罪他皆放此而觀之可也汪氏曰天王崩不名不地非畧之天下皆王土故不地以示無外四海皆王臣故不名以示獨尊劉氏曰王崩實赴以庚戌則聖人雖欲遷正亦不可得且於春秋何以見平王非庚戌崩乎左氏之說非也公羊云記崩不記葬必其時也非也凡書者皆為我有往者耳其名氏著者命卿也不著者微者也

夏四月辛卯尹氏卒

尹左作君

左傳夏君氏卒聲子也不赴於諸侯不反哭於寢不拊於姑故不曰薨不稱夫人故不言葬不書姓為公故曰君氏公羊傳尹氏者何天子之大夫也其稱尹氏何貶曷為貶譏世卿世卿非禮也外大夫不卒此何以卒天王崩諸侯之主也穀梁傳尹氏者何也天子之大夫也外大夫不卒此何以卒之也於天子之崩為魯主故隱而卒之程子曰尹氏王之世卿古者使以德爵以功世祿而不世官是以俊傑在位庶績咸熙及周之衰王皆世官政由是貶尹氏世為王官故於其卒書曰尹氏見其世繼也

尹氏天子大夫世執朝權為周階亂家父所刺秉國

之均不平謂何者是也

汪氏曰詩節南山朱子傳尹氏蓋吉甫之後春秋書尹氏

卒公羊以為讖世卿者即此也今按詩常武王謂尹氏指吉甫也家父云尹氏大師又云赫赫師尹則尹氏當幽王時為三公矣此書尹氏卒則來討于魯也五年傳稱王使尹氏助曲沃伐晉僖二十八年王命尹氏策命晉侯為侯伯文十四年王使尹氏訟周公于晉成十六年十七年尹武公會諸侯伐鄭昭二十三年尹氏立王子朝二十六年以子朝奔楚乃尹文公圉而傳稱尹卒尹固皆其族也詩刺尹氏不弔昊天亂靡有定傳記尹言多等殺天王之弟倭夫春秋譏尹氏輔子朝篡逆則尹氏始終秉權為亂

因

其告喪與立子朝以朝奔楚皆以氏書者志世卿非

禮為後鑒也

王氏曰宣王時吉甫已稱氏春秋惟尹武公兩伐鄭書子其餘經傳所紀悉曰

尹氏疑若漢大將軍霍氏專權秉政特寵異之而不名也春秋因其稱氏而筆之於經使後人考之見其

累世稱氏擅權為害則為鑒可知矣

或曰世卿非禮裳裳者華何以作

乎

詩裳裳者華小序古之仕者世祿小人在位則讒諂並進棄賢者之類絕功臣之世焉

曰功

臣之世世其祿世卿之官嗣其位祿以報功也故其

世可延位以尊賢也故其官當擇官不擇人世授之

柄黨與既衆威福下移大姦根據而莫除人主孤立

而無助國不亡幸爾春秋於周書尹氏武氏仍叔之

子於魯書季友仲遂皆志其非禮也公羊子此說必

有所受矣

薛氏曰先王之制內諸侯祿也外諸侯嗣世有世祿而無世官尹氏則世官矣前王

賜之之不名所以尊其德也世卿之不名也隳先王之禮而非尊賢之道也王臣不卒尹氏之卒因其父魯之赴而志周之過且紀王官之世也張氏曰平王繼幽厲之後不能擇畀忠賢以脩其政而因用致亂之族使之深根固抵而不可拔故春秋即其告終變例書氏以見平王不能中興周室之由而尹氏數百年相繼禍敗所以著世卿不擇賢之弊為後世之深戒也臨川吳氏曰天子之公卿大夫士其生也不外交於諸侯故其死也不赴告二百四十二年間惟劉卷王子虎以嘗同會盟而來赴尹氏以王崩為諸侯之主而來赴皆非禮也故書以示譏○啖氏曰左傳云君氏卒聲子也不書姓為公故曰尹氏按例無有改字以為義者豈有改其本姓乎如此特隱公之母實卒不行夫人禮亦當如定十五年姒氏卒書姓也劉氏曰昭公娶吳故諱其姓謂之孟子今聲子非魯同姓諱姓非義也特書君氏又不足明其為君母

若曰君母氏乃可矣龜山楊氏曰左氏春秋書君氏卒君氏乃惠公繼室聲子也而公羊春秋則書曰尹氏傳云大夫也然聲子而書君氏是何義理須當以尹氏為正

附錄

左傳鄭武公莊公為平王卿士王貳於虢鄭伯怨王王曰無之故周鄭交質王子狐為質於鄭

鄭公子忽為質於周王崩周人將界虢公政四月鄭祭足帥師取溫之麥秋又取成周之禾周鄭交惡君子曰信不由中質無益也明恕而行要之以禮雖無有質誰能間之苟有明信澗溪沼沚之毛蘋蘩藎藻之菜筐筥錡釜之器潢汙行潦之水可薦於鬼神可羞於王公而况君子結二國之信行之以禮又焉用質風有采蘋采蘋雅有行葦洞酌昭忠信也

秋武氏子來求賻

賻音附

此來求之始左傳王未葬也公羊傳武氏子者何天子
之大夫也其稱武氏子何譏何譏爾父卒子未命也何
以不稱使當喪未君也武氏子來求賻何以書譏何譏
爾喪事無求求賻非禮也蓋通于下穀梁傳武氏子者
何也天子之大夫也天子之大夫其稱武氏子何也未
畢喪孤未爵未爵使之非正也其不言使何也無君也
歸死者曰賻歸生者曰賵曰歸之者正也求之者非正
也周雖不求魯不可以不歸魯雖不歸周不可以求之
求之為言得不得未可知之辭也交譏之○程子曰武
氏王之卿士稱武氏見其世官天王崩諸侯不供其喪
故武氏遣其子徵求於四國書之以見天子之失道諸
侯不臣之甚也

武氏天子之大夫

家氏曰武氏子仍叔子銜命而出必皆有位於朝今乃以某氏子書

公穀於仍叔之子曰父老子代從政世其祿位者也
於武氏子乃曰父卒子未命蓋以仍叔為尚存之人

武氏為已卒之大夫諦觀經旨皆父在而子世其官者也。不然王朝公卿大夫莫非世官世祿之家。何獨於此二子而書法異乎？曰某氏子云者有父在焉。故也。臨川吳氏曰：稱氏義與尹氏同。子者父老而以子攝行卿之事。汪氏曰：隱五年王使尹氏武氏助曲沃伐晉，則武氏之子亦命為卿。而尹武皆為世卿可見矣。春秋書武氏之子，則嫌武氏之子自來求購仍叔子不加之字，又不見其父在。何以不稱

使當喪未君非王命也

汪氏曰：文九年毛伯求金以王居喪亦不稱使汪氏箋義

曰王在喪而使大夫求購罪在冢宰

嗣子定位於初喪其曰未君何也

古者君薨諒陰百官總已以聽於冢宰三年

漢孔氏曰諒信

也陰默也信默而不言也

夫百官總已以聽則是攝行軍國之事

也以非王命而不稱使春秋之旨微矣於以謹天下

之通喪

汪氏曰位有貴賤而生於父母無以異者故三年之喪自天子達於庶人當喪不稱王使

以見天子居喪不發命令則三年之喪無貴賤之殊矣而嚴君臣之名分也

汪氏

曰稱王使則同於至尊稱冢宰使則疑於無王故特不稱使夫賻以貨財則生者

所須索也君取於臣不言求而曰求賻求車求金皆

著天王之失道也上失其道則下不臣矣

杜氏曰魯不共主喪

致令有求經直書以示不敬龜山楊氏曰邦有大事而魯不賻雖問罪可也德不足以致之反求焉則天子微魯之跋扈不臣可知矣張氏曰惠公之薨宰嚭歸賻而平王之喪隱公不奔罪不勝誅為政於王室

者不能輔王以舉政刑而遣使下求於列國春秋直
書以見其隳體失政取輕天下文武之澤斬然矣入
隱公三年間經書周失止四事耳而人亡政息王道
之不復興蓋已具見此春秋所以為簡明也高郵孫
氏曰春秋之法為上者無求求之失上也失上者卑
之卑之者正其上不與有求也為下者無見求見求
失下也失下者誅之誅之者正其下不與見求也曰
賻曰金因喪而有求者也車無事而有求者也喪事
有贈無求而天子有求於下以是為亟也車服
上所以賜下而天子有求於下以是為失制矣

八月庚辰宋公和卒

左傳宋穆公疾名大司馬孔父而屬殤公焉曰先君舍
與夷而立寡人寡人弗敢忘若以大夫之靈得保首領
以沒先君若問與夷其將何辭以對請子奉之以主社
稷寡人雖死亦無悔焉對曰羣臣願奉馮也公曰不可

先君以寡人為賢使主社稷若棄德不讓是廢先君之舉也豈曰能賢光昭先君之令德可不務乎吾子其無廢先君之功使公子馮出居於鄭八月庚辰宋穆公卒殤公即位君子曰宋宣公可謂知人矣立穆公其子饗之命以義夫商頌曰殷受命咸宜百禄是荷其是之謂乎穀梁傳諸侯曰卒正也程子曰吉凶慶弔講信脩睦鄰國之常禮人情所當然諸侯之卒與國之大故來告則書

外諸侯卒國史承告而後書聖人皆存而弗削曷為弗削春秋天子之事也古者諸侯之邦交間問殷聘

而世相朝

周禮大行人凡諸侯之邦交歲相問也殷相聘也世相朝也

蓋王事相

從則有和好之情及告終易代則有弔恤之禮是諸

侯所以睦鄰國也周制王哭諸侯則大宗伯為上相

息亮反

司服為王制總麻宰夫掌邦之弔事戒令與其

幣器財用

周禮大宗伯朝覲會同則為上相王哭諸侯亦如之司服王為諸侯總衰宰夫凡邦

之弔事掌其戒令與幣器財用凡所共者是王者所

凡諸侯大夫之喪使其旅帥有司而治之

以懷諸侯也凡諸侯卒皆存弗削而交鄰國待諸侯之義見矣卒而或日或不日者何謹則書日慢則書

時其大致然也

劉氏曰君薨赴以日月禮之常也臣子少慢則赴不以日月大慢則都不

赴汪氏曰赴告以日史不書日則經弗削以見列國臣子之謹終赴告畧史不書日則經無自而書日以

見臣子之慢先君而忽其死生之大變也卒而或名或不名者何會盟則

名於載書聘問則名於簡牘

趙氏曰諸侯同盟名於載書朝會名於要約聘

告名於簡牘故於卒赴可知而紀也左氏云同盟則赴以名豈有臣子當創巨痛深之日乃忍稱君之名禮篇所錄云寡君不祿而已蓋曾同盟知其名故於死時書之以紀易代陸氏曰載書者載盟誓之辭於策具標同盟諸侯之名以告神而每國執一也簡牘者使使來聘及有言命之事皆有簡書也未嘗

會盟聘問而無所證者雖使至告喪其名亦不可得

而知矣凡此類因舊史而不革者也

茅堂胡氏曰天子崩而不名諸

侯薨而名所以別於天子也諸侯不生名大夫生而名所以別於諸侯也大夫書名氏微者名氏不登於

史冊所以別於大夫也此春秋正名分之法也家氏曰臣子赴君父以名夏殷以前或然周人諱名其赴必不以名春秋卒諸侯以名示諸侯之卒不得與天子等耳王一而已可不名諸侯衆也烏得不名其不名者史失之或微國之君不以名通非例也○汪氏曰晉獻公惠公未嘗同會盟通聘問而卒書名宿男同盟滕子杞子來朝而卒

諸侯曰薨大夫曰卒五等

不書名是皆據史舊文也

邦君何以書卒夫子作春秋則有革而不因者周室東遷諸侯放恣專享其國而上不請命聖人奉天討以正王法則有貶黜之刑矣因其告喪特書曰卒不與其為諸侯也故曰知我者其惟春秋乎罪我者其

惟春秋乎

茅堂胡氏曰禮天子曰崩諸侯曰薨大夫

曰聖人畧外以別內夫葬皆稱公曾不畧外以別內
何也奚獨至於卒而別之乎或曰史官在國承赴為
時君惡其薨名書曰卒夫惡其薨名而改書卒猶非
良史也春秋以道名分經世之書天子之事聖人之
筆削也天時王正猶刊舊史而正之君名直書而不
諱豈有避時君嫌惡之名而變亂名實以書之乎然
則云何不受命不與其為諸侯也其在生者或在喪
而出會或墨纁而即戎或以吉禮從征伐之役皆因
此以著諸侯失禮不臣之狀撥亂之意廣矣蜀杜氏
曰春秋諸侯專恣不可不黜而降之於魯獨稱薨者
非私魯也若於魯一槩而書之則後世無以見正禮
之稱也○劉氏曰穀梁云曰卒正也今正者曰墓者
亦曰曹伯使其世子射姑來朝則曹伯之嫡也射姑
卒有月無日何也左氏云凡同盟赴以名非也王巡

待四嶽則四方諸侯各隨其方伯州牧朝於天子死則相哀患則相恤朝聘通焉赴告及焉苟異方殊州生不共事患不共憂則朝聘不相通赴告不相及言同盟則赴以名非也同盟則相赴是也廬陵李氏曰宋鄭之爭始於此故四年宋殤會三國伐鄭為公子馮之在鄭也五年邾鄭伐宋其冬宋圍長葛六年取長葛八年盟瓦屋而不能成十年于防中丘之師鄭又挾齊魯以報宋雖鄭莊之姦雄然亦宋殤公忌馮之一念啟之也卒至與夷見弑然後已焉故公羊曰君子大居正宋之禍宣公為之然公羊不責殤公之忌克而反責宣公之推讓非矣

冬十有二月齊侯鄭伯盟于石門

此外諸侯特相盟之始左傳冬齊鄭盟于石門尋廬之盟也庚戌鄭伯之車僨于濟程子曰天下無王諸侯不

守信義數相盟誓所以長亂也故外諸侯盟來告者則書之張氏曰石門齊地

外盟會常事也何以書在春秋之亂世常事也於聖人之王法則非常也有虞氏未施信於民而民信夏后氏未施敬於民而民敬殷人作誓而民始畔周人

作會而民始疑

汪氏曰檀弓注會謂盟也明誓所以結衆以信其後外恃衆而信不由中

則民畔疑之今按虞書紀書征苗誓師之辭哀七年稱禹會諸侯于塗山則誓非始於殷會非始於周矣

周豐之對哀公蓋以誓之而畔會之而疑始于殷周耳

子曰大道之行與三代

之英丘未之逮也而有志焉

汪氏曰禮運注大道謂五帝時也英謂英異謂

夏殷周英異之主今按夫子謂五帝三代盛時雖未及見而猶有志於行五帝三王之道諸侯會

盟來告則書而弗削者其諸以是為非常典而有志

於天下為公之世乎故凡書盟者惡之也

陳氏曰齊鄭合也外

特相盟不書必關於天下之故而後書昔紀無足道也齊鄭合天下始多故矣天下之無王鄭為之也天下之無伯齊為之也是故書齊鄭盟石門以志諸侯之合書齊鄭盟于鹹以志諸侯之散是春秋之終始也春秋於隱桓莊之際唯鄭多特筆於襄昭定哀之際唯齊多特筆焉張氏曰隱公十一年之間盟而不食言者唯此石門之盟二君終身未嘗相伐蓋齊方盛強而鄭莊奸猾鄭仇專在於宋故鄭莊恃齊以敵之雖齊間與宋盟好而左右雜間必使惟已之從是以石門之盟雖不寒而宋與許紀諸國交受入伐春

秋詳書于策使人考其本末而知鄭莊多詐齊僖不義而強與二國相與之固列國並被其禍也臨川吳氏曰盟非盛世事也不得已而有蓋為衰世之亂邦罷民設春秋時王政不行諸侯放恣欲以戰伐而敵仇則不得不以盟會而固黨會不足恃而重之以盟人不自信而要之於神故凡書盟者春秋所惡也齊鄭盟石門繼以宋齊衛瓦屋之盟諸侯之黨合而無王近已胚胎齊霸之糾合矣齊鄭盟鹹繼以齊衛鄭沙曲濮之盟諸侯之黨散而無伯遠已醞釀秦雄之并吞矣閱世變者傷之汪氏曰左傳尋廬之盟則春秋之前齊鄭已有盟陳氏以石門之盟為諸侯之合特據春秋所書以立義耳元年盟蔑已特相盟然僅與附庸同歟非關於天下之故惟石門乃肇伯之端故特言之廬陵李氏曰齊鄭之交始此當是時鄭莊以小人之雄因是春交質之故有志於叛王而合諸侯始欲挾公子馮以謀宋而宋魯之黨方固無間而

入因齊僖有小伯之志於是黨齊以仇宋矣此石門
為東諸侯合黨之始而實齊伯之權輿也左氏於是
年首序周鄭交惡之事蓋亦為有
見于此王伯消長之機不在茲乎

癸未葬宋穆公

穆公穀作
繆後同

公羊傳葬者曷為或日或不及時而日渴葬也不
及時而不日慢葬也過時而日隱之也過時而不日謂
之不能葬也當時而不日正也當時而日危不得葬也
此當時何危爾宣公謂繆公曰以吾愛與夷則不若愛
女以為社稷宗廟主則與夷不若女蓋終為君矣宣公
死繆公立繆公逐其二子莊公馮與左帥勃曰爾為吾
子生母相見死母相哭與夷復曰先君之所為不與臣
國而納國乎君者以君可以為社稷宗廟主也今君逐
君之二子而將致國乎與夷此非先君之意也且使子
而可逐則先君其逐臣矣繆公曰先君之不爾逐可知

矣吾立乎此攝也終致國乎與夷莊公馮弑與夷故君子大居正宋之禍宣公為之也穀梁傳曰葬故也危不得葬也程子曰諸侯告喪曾往會葬則書春秋之時皆不請而私諡稱私諡所以罪其臣子

外諸侯葬其事則因魯會而書

徐邈曰凡書葬皆據我而言葬彼所以不

稱宋葬穆公而言葬宋穆公

而
其義則聖人或存或削曷為或存或

削春秋天子之事也傳稱諸侯五月而葬同盟至同盟謂同方嶽之盟者其生講會同之好其沒有葬送之禮是諸侯所以睦鄰國也按周制有職喪掌諸侯之喪禮蒞其禁令序其事

周禮職喪掌諸侯之喪及卿大夫士凡有爵者之喪

以國之喪禮並其禁令序其事

凡諸侯及諸臣葬於墓者則家人授

之兆為之蹕而均其禁

汪氏曰兆域也蹕禁人不令入禁所為塋限也

是王

者所以懷諸侯也外諸侯葬或存或削而交鄰國待

諸侯之義見矣葬而或日或不日者何備則書日畧

則書時其大致然也卒而或葬或不葬者何有怠於

禮而不葬者有弱其君而不葬者有討其賊而不葬

者有諱其辱而不葬者有治其罪而不葬者有避其

號而不葬者宋殤齊昭告亂書弑矣而經不書葬是

討其賊而不葬者也

汪氏曰如衛桓公齊襄公賊既討則書葬按舊史必皆書葬於

魯暈弑隱公立桓公而討爲氏有死者羽父既自匿其弑君之迹安得不葬隱公晉樂書中行偃弑厲公葬之於翼東門之外齊崔杼弑莊公葬諸士孫之里魯與齊姻親而晉則盟主也必往會葬舊史本皆書葬而春秋削之所以責其臣子之不能討賊也或謂君弑國亂禮不備故不書葬然昭八年楚滅陳陳嬖人袁克葬哀公豈能備禮而春秋書之邪晉主夏盟在景公時告喪書曰

矣而經不書葬是諱其辱而不葬者也

汪氏曰成十年公如晉晉

人止公使送葬諸侯莫在魯人辱之故不書諱之也

魯宋盟會未嘗不同而三

世不葬是治其罪而不葬者也

胡氏曰宋桓公襄公成公三世不書葬者

治其罪也

吳楚之君書卒者十亦有親送於西門之外者

矣

事見左傳襄公二十八年二十九年

而經不書葬是避其號而不葬

者也

杜氏曰吳楚之葬僭而不典故絕而不書

怠於禮而不往弱其君而

不會

汪氏曰滕邾屢朝魯而滕七君書卒三世不書葬邾亦七君書卒五世不葬莒宿書卒皆不葬

是皆怠於弔送欺其微弱非惟不使卿往亦不使微者往會茅堂胡氏曰葬非為死者而葬之也亦所以卹生者而助其所不及也

無其事闕其文魯史之舊也討其賊而

不葬諱其辱而不葬治其罪而不葬避其號而不葬

聖人所削春秋之法也故曰知我者其惟春秋乎罪

我者其惟春秋乎

張氏曰宋公魯也其稱公與齊衛異矣穆諡也諸侯合請諡於王然

春秋自蔡桓侯之外皆不請於王而私自諡者也家氏曰賤不諫貴少不諫長天子崩諫於郊諸侯薨諫於王春秋諸侯臣子之諡其君者不請於王而私自諡之諡春秋不削著臣子之罪汪氏曰暴秦以諡法為子議父臣議君而除之春秋譏私諡者非謂其臣子議君父也特以不請於王而罪之耳後世諸侯王宰相百官死而加諡必請於太常其得春秋之旨歟又曰經書諸侯卒者一百二十有四而書葬者八十有六其間弑而書葬者七卒而書葬七十有九耳○汪氏曰此葬宋穆公合五月之節而書曰穆公非弑其國無亂雖使公子馮出居於鄭馮已去則無謀亂者矣不可謂危不得葬蔡桓侯三月而葬書曰蔡季賢而請諡不可謂渴葬齊惠公三月而葬魯君奔喪卿往送葬齊國無難晉悼公三月而葬晉伯方盛平公

嗣素諸卿和睦不可謂慢葬而皆不日衛穆公六月而葬宋文公七月而葬並書日二國皆無亂而傳謂宋文公始厚葬不可謂痛之衛桓公十五年而葬陳靈公二十有一月而葬皆不日非不能葬蓋二君被弑故待討賊而後葬也今考或日或時蓋由魯會葬之禮備國史詳而書日經亦書之魯會葬之禮畧國史止書時經亦畧之若夫葬之遲速則據文考事而義自見若國無亂而葬速葬緩皆以著臣子之失禮國有亂而葬不以其時則以著人君不能防微杜漸於其始俾身沒弗藏而繼世者不得循送終之節且責臣子及天下諸侯方伯連率之緩於討賊也故劉氏曰公羊之說非也

附錄

左傳衛莊公娶于齊東宮得臣之妹日莊姜美而無子衛人所為賦碩人也又娶于陳日厲嬀

生孝伯早死其姊戴嬀生桓公莊姜以為己子公子州吁嬀人之子也有寵而好兵公弗禁莊姜惡之石

稽諫曰臣聞愛子教之以義方弗納於邪驕奢淫佚
所自邪也四者之來寵祿過也將立州吁乃定之矣
若猶未也階之為禍夫寵而不驕驕而能降降而不
憾憾而能矜者鮮矣且夫賤妨貴少陵長遠間親新
間舊小加大淫破義所謂六逆也君義臣行父慈子
孝兄愛弟敬所謂六順也去順效逆所以速禍也君
人者將禍是務去而速之無乃不可乎弗聽
其子厚與州吁游禁之不可桓公立乃老

壬桓王

四年

齊僖十二晉鄂五衛桓十六弑蔡宣三十
二年鄭莊二十五曹桓三十八陳桓二十六

杞武三十二宋殤公與夷元
年秦文四十七楚武二十一

春王二月莒人伐杞取牟婁

此伐國取邑之始公羊傳牟婁者何杞之邑也外取邑
不書此何以書疾始取邑也穀梁傳傳曰言伐言取所

惡也諸侯相伐取地於是始故謹而志之也程子曰諸侯土地有所受之伐其罪而奪取其土惡又甚焉王法所當誅也杜氏曰杞國本都陳留雍丘縣桓六年淳于公亡國杞始并之遷都淳于僖十四年遷緣陵襄二十九年晉人城淳于杞又遷都牟婁杞邑城陽諸縣東北有婁鄉張氏曰杞夏后氏之後周之三恪

取者收奪之名牟婁杞邑也

啖氏曰凡先言伐國下言取邑者明其國之邑

也如取郕取防上言敗宋師則宋邑可知

聲罪伐人而強奪其土故特書

曰取以著其惡或曰諸侯土地上受之天王下傳之先祖所以守宗廟之典籍也聖王不作諸侯放恣强者多兼數圻弱者日以侵削當是時有取其故地者

夫豈不可然僖公嘗取濟西田矣成公嘗取汶

音陽問

田矣亦書曰取何也苟不請於天王以正疆理而擅

兵爭奪雖取本邑與奪人之有者無以異

陸氏曰不能申明直

辭請於王以正疆理但專以兵爭奪不得正道故悉同辭言之

春秋之義不以亂易

亂故亦書曰取正其本之意也上二年莒人擅興入

向而天討不加焉至是伐國取邑其暴益肆矣

張氏曰征

伐天子之權土地諸侯所受之封莒人擅興兵以伐人又取其地明伐不以罪志在貪利故書伐書取見王法所當誅也薛氏曰諸侯曰天子之守臣地非其有也或取之或失之皆罪也陳氏曰春秋之初猶以

取邑為重故外取邑自隱以前則書之桓十四年宋以諸侯伐鄭取牛首而後皆不書高氏曰牟婁切鄰於魯魯無郕鄰救急之義至昭五年莒牟夷以牟婁叛而來奔魯遂受之其惡可知矣汪氏曰春秋書外伐國者一百二十有八惟此書伐書取餘書圍邑者三書伐戰者一書伐救者一蓋中葉以後爭地爭城殺人盈野諸侯城邑今日奪之於此明日并之於彼得失無常不足悉書故傳言取地而經不書取者甚多蓋以擅興殘民為重而土地之攘奪不服論矣是知此年伐杞取牟婁乃一經持筆聖人實深致意焉○廬陵李氏曰取字例胡氏曰悉虜而俘之曰取取師于雍丘于岳是也取者得非其有之稱取郕鼎之類是也取者收奪之名取牟婁長葛之類是也此三例亦畧相通矣左氏以取為易又曰不用師徒則宋取長葛連兵經年何易之有故趙子曰凡力得之曰取

戊申衛州吁弑其君完

此書弑之始左傳衛州吁弑桓公而立公羊傳曷為以國氏當國也穀梁傳大夫弑其君以國氏者嫌也弑而代之以程子曰自古篡弑多公族蓋自謂先君子孫可為君國人亦以為然而奉之春秋於此明大義以示萬世故春秋之初弑君者多不稱公子公孫蓋身為大惡自絕於先君矣豈復得為先君子孫也古者公族刑死則無服況弑君乎大義既明於初矣其後弑立者則皆以屬稱或見其以親而寵之太過任之太重以至於亂或見其天屬之親而反為寇讎立義各不同也春秋大率所書事同則辭同後人因謂之例然有事同而辭異者蓋各有義非可以例拘也

此衛公子州吁也而削其屬籍特以國氏者罪莊公

不待之以公子之道使預聞政事主兵權而當國也

茅堂胡氏曰春秋絕州吁屬籍著宗室公族之有寵者不可與政當國主兵之意督萬無知亦公族大夫而絕其屬籍義與此同或曰必若此言春秋之法非通法矣周公康叔非懿親與政乎曰尊賢然後能親親急親賢為堯舜之道則親之賢者必先得於疎之賢者不偏於寵愛其親屬而無尊賢之等也經書季子來歸不稱公子兼親賢之道其法可謂通矣以公子之道待州吁教以義

方弗納於邪不以賤妨貴少陵長則桓公之位定矣

亂何由作州吁有寵好兵而公弗禁石碯盡

子忍反

言

極諫而公弗從是不待以公子之道使預聞政事主

兵權而當國也春秋之旨在於端本清源

汪氏曰本正則末不

偏源清則流不濁

以衛詩綠衣諸篇考之所謂前有讒而不

見後有賊而不知者莊公是也

汪氏曰按詩朱子傳綠衣乃莊姜賢而失

位刺莊公惑於嬖妾燕燕乃莊姜妾桓公母戴嬖大歸於陳莊姜送之而作日月乃莊姜不見答於莊公故呼日月而訴之終風乃莊公暴慢無常莊姜正靜自守故忤其意而傷已之詩張氏曰衛國之禍始於莊公之寵州吁縱其好兵而不之禁公存之時妾上僭夫人失位見於衛詩則亂根之萌久矣殖之滋長終不能圖以致篡弒成於桓公既立之後春秋據事直書亦將使讀者原禍敗之所從起而嚴履霜之戒也夫君臣父子夫婦之分一失其正則亂之所從生衛莊溺愛而使內寵僭嫡嬖子害正石碣之諫足以

悟矣懷而弗圖辨之弗早貽禍後嗣可謂慘矣

其不稱公子而以國氏著後

世為人君父者之戒爾故傳有之曰為人君父而不

通春秋之義者必蒙首惡之名

董子語見太史公自序陳氏曰隱桓莊之

春秋凡弑君之賊皆名之汪氏曰州吁不稱公子程子謂州吁身為大惡自絕於先君故不得為先君子孫文定謂莊公不待以公子之道使致大惡故以國氏今按二義蓋互相發州吁弑桓公而自立罪兼篡弑與間職耶歌之徒懷忿挾怨而輕動於大惡者又霄壤不侔春秋首絕其族屬書名以弑及其誅戮亦止書名舊史必皆稱公子聖人削之以示天討之刑也通諸一經弑君者二十有五稱世子弑者三楚商臣蔡般許止公族而削其屬與氏者四衛州吁齊無知宋督宋萬稱公子者三齊商人鄭歸生楚比大夫

而稱氏稱名者六晉里克趙盾陳夏徵舒齊崔杼陳
乞衛甯喜稱人者三稱國者四稱閹稱盜者各一夫
世子有父之親有君之尊位其所固有國其所宜君
而至推刃於君父窮凶極惡不待貶絕而自見然考
其所由致之故則為之君父者必失其道以及於此
則首惡之名寧不為天下萬世之大戒乎公族而不
書其屬與氏者兩致其貶或有以公子書者程子所
謂見其以天屬之親而反為寇讎而其君寵之大過
任之太重以至於亂其罪亦不可揜矣其稱人以弑
者謂多行無道肆於民上為國人之所欲弑故稱國
稱人以明君雖無道通國之人皆欲弑之而三綱入
道之大倫君臣之義不可廢也特蔽賊於國人則操
刃為大惡者可未減爾稱國以弑不書其人則著當
國執政大臣之罪而其所以為當國大臣之所弑則
必有由矣稱閹以弑而不稱君則見閹寺之賤不得
君其君而狎近刑人至於不克保身者君之過也稱

盜則匹夫之微視如路人又非闖人之比故並不書弑夫弑逆之賊固無所容於天地之間歷千萬世而其罪不赦然其君之不早辨以陷於大惡豈非古今之龜鑑哉○劉氏曰穀梁謂以國氏者嫌也弑而代之也督萬豈可云弑而代之乎公子商人豈非弑而代之乎

夏公及宋公遇于清

此書遇之始左傳公與宋公為會將尋宿之盟未及期衛人來告亂夏公及宋公遇于清公羊傳遇者何不期也一君出一君要之也穀梁傳及者內為志焉爾遇者志相得也○程子曰諸侯相見而不行朝會之禮如道路之相遇故書曰遇非周禮冬見曰遇之遇也杜氏曰清衛邑濟北東阿縣有清亭

遇者草次之期

杜氏曰遇者二國各簡其禮若道路相逢遇也朱子曰言草草不成禮也

古有遇禮不期而會以明造次亦有恭肅之心春秋
書遇私為之約自比於不期而遇者直欲簡其禮爾

趙氏曰簡禮而會曰遇啖氏曰遇禮忽有邂逅相遇
簡畧而行故與會禮不同時雖非相遇而從簡易以
遇禮相見茅堂胡氏曰古者諸侯或因朝覲或從王
命無期約而適值於途必有兩君相見之義近者為
主遠者為賓稱先君以相接所以崇禮讓絕慢易也
故謂之遇周衰諸侯放恣出入無期度私為邂逅之
約有如適值於途者亦謂之遇非矣簡畧慢易無國君之禮則莫適

丁歷

反主矣故志內之遇者四而皆書及

汪氏曰此年遇清莊二十三年

遇穀二十年遇魯濟僖十四年遇防

若曰以此及彼然也志外之遇者

三而皆以爵

汪氏曰八年宋衛遇垂莊四年齊陳鄭遇垂三十二年宋齊遇梁丘

若曰

以尊及卑然也其意以為莫適主者異於古之不期

而會矣故凡書遇者皆惡其無人君相見之理也

高氏

曰國君之出必有卿大夫車徒之從旌旗之識使人儼然望而畏之豈苟然哉各逞私欲奔走道塗之間若匹夫然非先王之法也張氏曰春秋因事而書以譏其非王事而出境無國君之禮襄陵許氏曰隱莊之間凡六書遇自閔以後有會無遇汪氏曰遇者偶也偶然相會素無期約如伊尹遇汝鳩汝方孟子遇宋牼於石丘是也公穀釋名義皆謂不期為遇左氏此年傳與戴記之說則以未及期為遇左氏遇垂梁丘之傳則皆云先為之約而以簡禮相會者春秋諸侯之未及期或私為之約而以簡禮相會者春秋諸侯之

禮也。觀昭公孫齊而公羊記其以遇禮相見則知非不期之遇耳。然桓十年公會衛侯于桃丘弗遇則又期而不至者也。古者諸侯因王事不期而遇倉卒之間且有禮義春秋之時非王事而出預有期約以相會聚乃行古者不期之禮是自欺耳。怠惰慢易馴致於期而不至則欺詐尤甚矣。世變愈下風俗之偷良可歎夫。○啖氏曰穀梁云遇者志相得也。為桓十年傳云不遇者志不相得遂云爾公羊又云一君出一君要之假如實然忽以會禮相見豈得書遇哉。劉氏曰穀梁云及者內為志焉爾遇者志相得也若內為志又志相得非不期也。

宋公陳侯蔡人衛人伐鄭

此諸侯會伐之始亦東諸侯分黨之始左傳宋瑯公之即位也公子馮出奔鄭鄭人欲納之及衛州吁立將脩

先君之怨於鄭而求寵於諸侯以和其民使告於宋曰
君若伐鄭以除君害君為主敝邑以賦與陳蔡從則衛
國之願也宋人許之於是陳蔡方睦於衛故宋公陳侯
蔡人衛人伐鄭圍其東門五日而還公問於衆仲曰衛
州吁其成乎對曰臣聞以德和民不聞以亂以亂猶治
絲而棼之也夫州吁阻兵而安忍阻兵無衆安忍無親
衆叛親離難以濟矣夫兵猶火也弗戢將自焚也夫州
吁弑其君而虐用其民於是乎不務令德而欲以亂成
必不免矣程子傳宋以公子馮在鄭故與諸侯伐之也
摟諸侯以伐鄭固為罪矣而衛弑其君天下所當誅也
乃與脩好而同伐人其惡甚矣張氏曰
陳在陳州宛丘縣蔡在蔡州上蔡縣

春秋之法誅首惡興是役者首謀在衛而以宋主兵
何也前書州吁弑君其罪已極至是阻兵脩怨勿論

可也而鄰境諸侯聞衛之有大變也可但已乎陳恒弑簡公孔子沐浴而朝告於哀公請討之公曰告夫三子者子曰以吾從大夫之後不敢不告也之三子告不可子曰以吾從大夫之後不敢不告也

事見左傳哀公

十四年朱子曰臣弑其君人倫之大變天理所不容人人得而誅之况鄰國乎故夫子雖已告老而猶請哀公討之可堂吳氏曰孔子作春秋以討亂賊是年春秋已絕筆而猶請討陳恒作春秋者莫如孔子用春秋者亦莫如孔子然則鄰有弑逆聲罪赴討雖先發而後聞

可矣

茅堂胡氏曰晉益州刺史皇甫晏為牙將張宏所殺廣漢主簿李毅言於太守王濬宜即赴討

濬欲先請殺止之曰賊為惡尤大當不拘常制何請之有即發兵追宏而晉朝不以擅興罪濬是得春秋之旨矣

宋殤不恤衛有弑君之難欲定州吁而從其邪說是肆人欲滅天理非人之所為也故以宋公為首

諸國為從

才用反茅堂胡氏曰春秋有誅亂臣賊子之法凡數十條如伐鄭以宋公為首惡書

衛人弑州吁之類學者知此義則能守死節當弑父與君之際而不從亂臣賊子見其義則懼及其身而

不敢肆

示誅亂臣討賊子必先治其黨與之法也此義

行為惡首孤矣故曰春秋成而亂臣賊子懼

張氏曰宋自殤

公立公子馮出居鄭之后馮以穆公不立已為恨謀反取其國鄭莊又從而佐之於是宋鄭為仇及是衛

州吁欲定其位告宋求伐鄭以除子馮之害故宋幸
陳蔡以同伐鄭夫宋殤受國於穆公而馮有爭位之
心正當脩德和民外好鄰國則其位自定而馮無所
伺其隙矣况州吁逆賊內懷見討之懼而欲納交殤
公苟名其為賊告于王而討之則一舉而君臣父子
之倫定今乃怵於邪說合陳蔡以助逆賊使宋國之
人不復知君臣順逆之正理惟是日從事于兵而弑
逆之事卒及其身皆殤公不能早辨於此役也汪氏
曰邶風擊鼓詩序云衛州吁用兵暴亂使公孫文仲
將而平陳與宋經書衛人於蔡人之下所以誅文仲
黨惡而忘不共戴天之讎也朱子謂小序譏州吁勇
而無禮極為淺陋今考魯衆仲不目其元兇大慙而
但云阻兵安忍益君臣之義不明
於天下久矣春秋其得不作乎

秋翬帥師

翬許
歸反

此大夫會伐之始左傳秋諸侯復伐鄭宋公使來乞師公辭之羽父請以師會之公弗許固請而行故書曰翬帥師疾之也公羊傳翬者何公子翬也何以不稱公子貶曷為貶與弑公也其與弑公奈何公子翬諸乎隱公謂隱公曰百姓安子諸侯說子盍終為君矣隱曰吾否吾使修塗裘吾將老焉公子翬恐若其言聞乎桓於是謂桓曰吾為子口隱矣隱曰吾不反也桓曰然則奈何曰請作難弑隱公於鍾巫之祭焉弑隱公也穀梁傳翬者何也公子翬也其不稱公子何也貶之也何為貶之也與乎弑公故貶也程子曰翬不稱公子弑逆之人積其強惡非一朝一夕辨之宜早故去其公子隱公不能辨是以及禍

按左氏諸侯謀伐鄭宋公使來乞師公辭之羽父請

以師會之公弗許固請而行

薛氏曰師興而後翬會之王氏曰元年鄭伐衛

請師於邾邾子私於公子豫豫請往弗許遂行然
豫之專行不見貶者伐衛之事不見於經故爾

易

曰履霜堅冰至履霜陰始凝也馴致其道至堅冰也

臣弑其君子弑其父非一朝一夕之故其所由來者

漸矣由辨之不早辨也

程子曰天下之事未有不由于積而成其大至於弑逆之禍

皆因積累而至非朝夕所能成也明者則知漸不可長小積成大辨之於早故天下之惡無由而成汪氏曰聖人作易常以陽為君子陰為小人大易言陰陽昉見於乾坤初爻故坤之初六其象為履霜蓋霜者陰氣之始凝陰盛則水凍而為冰極盛而為堅水陽主生陰主殺故弑君者不善之積自微至著亦猶微陰漸積而至
於極盛也
宋公來乞師而公辭之羽父請以師會

而公弗許其辭而弗許義也。翬以不義強其君，固請而行，無君之心兆矣。夫公子公孫升為貴戚之卿者，其植根膠固，難御於異姓之卿。況翬已使主兵而方命乎？

蔡氏曰：方命者，逆命而不行也。王氏曰：圓則行，方則止。

隱公不能辨之於

早，罷其兵權，猶使之帥師也。是以及鍾巫之禍，春秋

於此去其公子以謹履霜之戒。

陳氏曰：會伐未有言帥師者，文三年叔孫

得臣成八年叔孫僑如皆不言帥師，此特言帥師，翬弑隱者也。諸侯專征而後千乘之國有弑其君者矣。大夫專將而後百乘之家有弑其君者矣。永嘉呂氏曰：書帥師則翬專兵可知，故單伯會伐宋不言帥師。

家氏曰不稱公子去族之誅也桓之弑翬為首惡故當隱世去其族以正其猷君之罪及桓世而仍其公子之號明其與桓同惡也此春秋誅討亂賊始見於魯事者也杜氏曰外大夫貶皆稱人內大夫貶皆去族○汪氏曰翬不稱公子劉氏謂左傳以翬溺為貶無駭未賜族如傳無說則翬溺可以無駭言之無駭可以翬溺言之或謂翬本再命大夫其後桓公立進為三命始書氏今考公子非氏若臧孫仲孫乃氏也若曰未賜族則公子不當賜族諸侯之子稱公子公子之子稱公孫公孫之子乃以王父字為氏桓三年稱公子翬則翬未賜族明矣傳稱去氏蓋以不稱公子同於去族耳若曰翬非命卿據經則兩帥師會伐據傳無駭卒而請諡與族滕薛尊長而公使請於薛侯苟非命卿未必至若是親暱用事也曰未賜族非命卿義不可通况無駭為司空則亦為命卿矣特未賜族故止書名惟先公之子而不書公子乃為貶爾

廬陵李氏曰春秋書內大夫會伐者八輩溺皆貶辭單伯得臣歸父僑如叔豹叔老之無貶者伯令也獨貶輩之說公穀以為輩有弑隱之罪故終隱之篇貶之然輩未弑而先貶恐無此理故明氏從左傳會伐未有言帥師而輩兩言帥師蓋大夫專將而後百乘之家有弑君者矣

會宋公陳侯蔡人衛人伐鄭

左傳諸侯之師敗鄭徒兵取其禾而還程子曰宋公用其民衛當誅之賊而與之同伐人其罪大矣二國構怨而他國與之同伐其罪均也再序四國重言其罪左氏以為再伐妄也

春秋立義至精詞極簡嚴而不贅也若曰輩帥師會伐鄭豈不白乎再序四國何其詞費不憚煩也言之

重詞之複其中必有大美惡焉四國合黨翬復會師
同伐無罪之邦欲定弑君之賊惡之極也言之不足
而再言聖人之情見矣天地造物化工運其神春秋
討賊聖筆寫其意再序四國而誅討亂臣之法嚴矣

永嘉呂氏曰州吁弑君之賊未能定其位而求寵於
諸侯使宋公如夫子沐浴之意率諸侯以討罪人可
也今也徇逆賊之謀脩一己之怨合四國以伐鄭四
國之兵方合而翬又帥師會之亂臣賊子之勢益張
故書翬帥師而再序四國聖人之筆嚴矣陳氏曰春
秋之為例三有同號者焉有同辭者焉有同文者焉
號不足以盡意而後見於辭辭不足以盡意而後見
於文以同文為猶未也而至於變文則特書也於是

公子初弑君衛人為之變不踰年能討之衛猶有臣子也而五國之君大夫伐鄭以定州吁弑君天下之大惡也五國之君大夫有人心焉不若是甚矣書曰宋公陳侯蔡人衛人伐鄭秋鞏帥師會宋公陳侯蔡人衛人伐鄭書之復書之春秋緩一再見焉特書之法嚴矣張氏曰再書四國者乃重言以見其罪惡之不可勝誅既叙之又重叙之所以反覆痛宋殤失計陳蔡無人黨亂賊以虐無辜視臣弑其君之大變雖在禽獸所不為者而以為可親魯鞏又從而翼之遂使中國之人視為常事未幾魯宋淪胥繼亂學者於此當知聖人傷世變扶天理之深旨汪氏曰春秋一經書辭重複者有五僖五年會盟首止九年會盟葵丘美也此年代鄭襄二十七年會盟于宋昭十三年會盟平丘惡也

九月衛人殺州吁于濮

濮音卜

左傳州吁未能和其民厚問定君於石子石子曰王覲
為可曰何以得覲曰陳桓公方有寵於王陳衛方睦若
朝陳使請必不可得也厚從州吁如陳石碯使告于陳曰
衛國福小老夫耄笑無能為也此二人者實弑寡君敢
即圖之陳人執之而請蒞於衛九月衛人使右宰醜蒞
殺州吁于濮石碯使其宰孺羊肩蒞殺石厚于陳君子
曰石碯純臣也惡州吁而厚與焉大義滅親其是之謂
乎公羊傳其稱人何討賊之辭也穀梁傳稱人以殺殺
有罪也州吁之絜失嫌也其月謹之也于濮者譏失賊
也程子曰稱衛人衆辭也舉國殺之也杜氏曰濮陳地
水名張氏曰
在曹衛之間

伐鄭稱人責詞也殺州吁稱人衆詞也

茅堂胡氏曰
陸淳云經中

一字徧施於諸例而義不同者惟人字爾此說是也
或衆而稱人或美而稱人或諱而稱人或貶而稱人

或賤而稱人

知然者伐鄭之役公孫文仲為主將而變文

稱人則是指國人聽州吁號令從文仲而南行者也

故曰責詞其殺州吁則石碣

七畧反

謀之而使右宰醜

蒞也變文稱人則是人皆有欲討賊之心亦夫人之

所得討也

禮記檀弓臣弑君凡在官者殺無赦子弑父凡在官者殺無赦注言諸臣子孫無尊卑皆得殺之其罪無赦朱子曰春秋之法

亂臣賊子人人得而誅之不必士師也

故曰衆詞

公羊子曰稱人者何討賊之詞也

何氏曰明國中人人得討之所以廣

忠孝之路書者善之也范氏曰有弑君之罪者則舉國之人皆欲殺之趙氏曰凡作亂自立為君而國入

殺之者皆稱人以殺言衆所共棄不君之也廬陵李氏曰春秋討賊書人例六州吁無知陳佗徵舒樂盈良霄是也樂盈良霄雖非弑君而皆叛逆之臣故書法同晉里克弑君而惠公殺之不以其罪故不予以討賊楚比弑君而棄疾殺之亦非正故不成其為賊商人弑君而齊人殺之不得例於討賊蔡般弑父而楚子殺之亦不得例於討賊者罪齊蔡國人不以為賊而君之也

其義是矣于濮者

憫衛國之人著諸侯之罪也

范氏曰譏其不即討乃令至濮

衛人失

賊而曰著諸侯之罪何也夫州吁二月弑君而不能即討者緣四國連兵欲定其位故久然後能殺之于濮耳非諸侯之罪而何夫以討賊許衆人而以失賊

罪鄰國與賊者寡矣故曰春秋成而亂臣賊子懼

高氏

曰稱國稱入稱地所以廣忠臣孝子之義使人人皆得殺之而無間於尊卑又使亂臣賊子雖竊發於一時而天地之大四海之廣欲逃無所也陳氏曰討賊天下之大義也苟能討雖微者得書異邦人得書外裔得書苟不能討雖以文十七年四國之大夫伐宋不書其大夫疑於討也而非討則雖以襄二十五年十二國之君伐齊不書伐矣家氏曰不書衛石碯殺州吁者討賊者公法也衆望之所同也書石碯則是一人之私討而不見其從衆望討有罪矣故惟書衛人言衛國猶有人能以討賊為事也汪氏曰宋萬之弑宋人求賊于陳慶父之弑魯人求賊于莒皆責賂而後與今此陳人能執州吁而不匿賊取賂亦賢於後此陳莒之為矣然陳乃衛桓之母家而陳侯亦親率兵會伐鄭欲定其位則今日之善不足以贖前日

之過故經不書陳人執州吁而止著衛人之殺之也杜預且謂州吁未列於會故不稱君據成十六年傳寡君若有罪則君列諸會而云然也夫篡弑之賊歷千萬世而其罪不赦石碯謂王覲為可實以元惡大慙王法所必誅而不可見王耳孰謂列於諸侯之會而可以貸其罪乎君臣之義不明已久春秋之時習為邪說貪賂黨惡肆無忌憚是以桓弑隱則棄許田而與鄭盟越宣弑亦則獻濟西而結齊會平州傳紀其事而不知經意誅貶之所在越千百年杜預反引之以釋經天理泯滅壹至此極噫可嘆哉又見莊公九年

冬十有二月衛人立晉

左傳衛人逆公子晉于邢冬十二月宣公即位書曰衛人立晉衆也公羊傳晉者何公子晉也立者何立者不

宜立也其稱人何衆立之之辭也然則孰立之石磻立之石磻立之則其稱人何衆之所欲立也衆雖欲立之其立之非也穀梁傳衛人者衆辭也立者不宜立者也晉之名惡也其稱人以立之何也得衆也得衆則是賢也賢則其曰不宜立何也春秋之義諸侯與正而不與賢也程子曰書衛人立晉衛人立之也諸侯之立必受命于天子當時雖不請命于天子猶受命於先君衛人以晉公子也可以立故立之春秋所不與也雖先君子孫不由天子先君之命不可立也故去其公子

人衆辭

汪氏曰殺州吁衆辭乃王法所當討而衛人皆欲討之故書入以善之立晉衆辭乃無天

王之命而衛人以私意欲立而擅立之故書人以罪之美惡不嫌同辭

立者不宜立也

何氏曰諸侯立不言立此獨言立明不宜立之辭范氏曰嗣子有常位故不言立立納入皆非正也

晉

雖諸侯之子內不承國於先君上不稟命於天子衆

謂宜立而遂自立焉可乎故春秋於衛人特書曰立

汪氏曰昭二十三年尹氏立王子朝以庶孽奪正亦書曰立涉隨程氏曰衛人立晉一國之公也尹氏立朝一族之私也廬陵李氏曰晉與子朝皆不宜立晉為國人所與子朝獨為尹氏所與故書法異朝書王子而晉不書公子者朝之罪已顯晉之得衆宜於當立故特去公子以見之也臨川吳氏曰立者非前傳後承之正所立雖是亦非正禮也所以著擅置其君之罪於晉絕其

公子所以明專有其國之非以此垂法而父子君臣之義明矣未有為子而不受之父也未有為諸侯而

不受之王也

高氏曰晉乃桓公之弟莊公之子於次當立又國人之所同欲而謂之不宜立

何也彼曰我君之子也國我之國我宜立國人亦曰彼吾君之子也國乃其國彼當立是諸侯之子不必命于天子特以公子之親衆人宜之而自立也如此則千乘之國皆可擅置其君而邦君之子皆可專有其國矣高郵孫氏曰晉以國人衆立宜有得立之禮聖人特於疑似之間而明不當立之義陳氏曰爭國不稱公子晉曷為以爭國之辭書之衛之臣子可以討賊不可以置君州吁為僂而晉受之上無天子下無君父是亦爭國而已矣繼故未有書立者賊不討君不葬讖不在立也是故宋殤之弑也馮立閔之弑也御說立晉靈之弑也黑臀立厲之弑也周立皆不書必若衛人賊討君葬而後書立廬陵李氏曰謝氏云王命天下之大本也立雖正非王命則在所治受立雖順非王命則在所紂張氏曰凡繼亂而立者必

有懲艾革弊之政憤悱圖治之思而後可以保國而
圖終宣公遭大亂而得位既葬踰時首擅興兵以脩
怨為事則知其無安國固本之志矣家氏曰衛人以
晉為賢而立之而晉也志得而驕晚為獸行新臺之
刺作焉是以春秋於其始立而去其公子以見衛亂
之所從始○陸氏曰穀梁曰晉之名惡也按晉是其
名有何

惡乎

癸桓王

五年

齊僖十三晉鄂六奔衛宣公晉元年蔡宣
亥二年三十二鄭莊二十六曹桓三十九陳桓二

十七杞武三十三宋殤二
秦文四十八楚武二十三

春公觀魚于棠

觀左
作矢

左傳公將如棠觀魚者臧僖伯諫曰凡物不足以講大
事其材不足以備器用則君不舉焉君將納民於軌物

者也故講事以度軌量謂之軌取材以章物采謂之物
不軌不物謂之亂政亂政亟行所以敗也故春蒐夏苗
秋獮冬狩皆於農隙以講事也三年而治兵入而振旅
歸而飲至以數軍實昭文章明貴賤辨等列順少長習
威儀也鳥獸之肉不登於俎皮革齒牙骨角毛羽不登
於器則公不射古之制也若夫山林川澤之實器用之
資阜隸之事官司之守非君所及也公曰吾將畧地焉
遂往陳魚而觀之僖伯稱疾不從書曰公觀魚于棠非
禮也且言遠地也公羊傳何以書譏何譏爾遠也公曷
為遠而觀魚登來之也百金之魚公張之登來之者何
美大之之辭也棠者何濟上之邑也穀梁傳傳曰常事
曰視非常曰觀禮尊不親小事卑不尸大功魚卑者之
事也公觀之非正也程子曰諸侯非王事民事不遠出
遠出觀魚非道也杜氏曰高平方與縣北有武唐亭魯
侯觀魚臺張氏曰

在單州魚臺縣

齊景公問於晏子吾欲觀於轉附朝舞遵海而南放
于琅邪吾何脩而可以比於先王觀也對曰天子適
諸侯曰巡狩巡所守也諸侯朝于天子曰述職述職

者述所職也無非事者春省耕而補不足秋省斂而助

不給

朱子曰巡所守巡行諸侯所守之土也述所職陳其所受之職也皆無有無事而空行者而又

春秋循行郊野察民之所不足而補助之不敢無事慢遊以病其民也

是故諸侯非王

事則不出非民事則不出

汪氏曰朝于京師于方嶽王事也春省耕秋省斂民

事也蘇氏曰天子諸侯無非事者動必有為也隱公怠棄國政觀魚于棠可謂非事者矣今隱公

慢棄國政遠事逸遊僖伯之忠言不見納亦已矣又從而為之辭是縱欲而不能自克之以禮也能無鐘巫之及乎特書觀魚譏之也

張氏曰昔益戒舜曰儆戒無虞罔失法度罔遊于佚

罔淫于樂周公告成王曰毋淫于觀于逸于游于田又曰無違曰今日耽樂乃非民攸訓非天攸若蓋兢兢業業非禮勿動然後足以正國而治人一或惟耽樂之從則將以逸豫而滅厥德隱公忽僖伯之匡諫而遠從事於遊觀非所以為君國子民之道春秋特書所以示人君當循理遵法以隱公為戒也臨川吳氏曰古者天子季冬之月命漁師始魚先薦寢廟隱公蓋非為宗廟嘗魚而往棠乃遠地漁師取魚而公往觀之特為遊觀之樂爾汪氏曰月令季冬乃周之二月經書春觀魚則是周正月未當嘗魚之時况僖

伯之言曰鳥獸之肉不登于俎則君不射又曰山林川澤之實非君所及則隱公決非為嘗魚而往明矣苟隱公果為嘗魚薦廟則為常事得禮而不書矣且天王之喪未畢而驅馳於遠境肆意逸遊其罪何所逃哉

附錄

左傳曲沃莊伯以鄭人邢人伐翼王使尹氏武氏助之翼侯奔隨

夏四月葬衛桓公

左傳衛亂是以緩穀梁傳月葬故也程子曰稱桓公見國人私諡也魯往會故書送終大事也必就正寢不殯於婦人之手曾子易簣而歿豈苟然乎死而加之不正之諡知忠孝者肯為乎

衛亂是以緩

汪氏曰桓公被弒八月而後討賊十五日而後克葬

魯往會故書

汪氏曰非魯人往會則魯史無由紀其葬聖人存而弗削者弑逆之賊討

矣

汪氏曰弑逆人道之大變送終臣子之大事君弑而臣子能討其賊則送終之責始盡

諡者

行之迹

范氏曰諡者行之迹所以表德周公制諡法大行受大名小行受小名所以勸善而懲惡

所以紀實德垂勸戒也名之曰幽厲雖孝子慈孫百

世不能改失位而見弑何以為桓

諡法辟土服遠曰桓

列爵惟

五皆王命也衛本侯爵何以稱公見臣子不請於王

而私自諡爾

王氏曰先王之制諸侯初立喪畢則以士服見天子而賜之命及其歿則臣子

請於王而賜之諡今衛桓公諡不當其行號不同其爵春秋據事直書而罪自見矣

程氏曰正

終大事也必於正寢而不歿於婦人之手

禮記喪大記君夫人

卒於路寢男子不死於婦人之手婦人不死於男子之手

豈苟然乎死而加之不

正之諡知忠孝者不忍為也春秋於邦君薨正以王法而書卒至於葬則從其私諡而稱公或革或因前以貶不臣順之諸侯後以罪不忠孝之臣子詞顯而

義微皆所以遏人欲存天理大居正也

張氏曰春秋之時為臣子

者皆無以正君父之終程子之言深足以發明一經書葬之旨桓公名完而諡桓蓋古不諱嫌名也○汪氏曰穀梁云月葬故也非也後此蔡宣曹桓鄭莊皆非哉何以月葬乎

附錄

左傳四月鄭人侵衛牧以報東門之役衛人以燕師伐鄭鄭祭足原繫洩駕以三軍軍其前使

曼伯與子元潛軍軍其後燕人畏鄭三軍而不虞制人六月鄭二公子以制人敗燕師于制北君子曰不備不虞不可以師○曲沃叛王秋王命虢公伐曲沃而立哀侯于翼

秋衛師入邲

邲音成公作盛

左傳衛之亂也邲人侵衛故衛師入邲公羊傳曷為成言率師或不言率師將尊師衆稱某率師將尊師少稱將將卑師衆稱師將卑師少稱人軍將不言率師書其重者也穀梁傳入者內弗受也邲國也將卑師衆曰師程子曰衛晉乘亂得之不思安國保民之道以尊王為先居喪為重乃興戎脩怨入人之國書其失道也

稱師者紀其用衆而立義不同有矜其盛而稱師者

如齊師宋師曹師城邢之類是也

汪氏曰僖元年諸侯救邢邢遷夷儀

諸侯城之經皆書師者美桓公救患之功故錄其兵衆之盛也

有著其暴而稱師者

楚滅陳蔡公棄疾主兵而曰楚師之類是也

汪氏曰昭

八年楚公子棄疾帥師奉孫吳圍陳十月壬午滅陳十一年楚公子棄疾帥師圍蔡十一月楚子滅蔡經皆書楚師所以著荆楚擅興大衆以滅中夏諸侯之國誅其暴橫憑陵之甚也有惡其無名

不義而稱師者次于郎以俟陳蔡及齊圍邾之類是

也

汪氏曰莊八年師及齊師圍邾邾降于齊師仲慶父請伐齊師公曰不可則同圍邾者公也經書師

次而不言公次書師及而不言公及書師還而不言公至者所以責莊公無名黷武非義勤民諱不書公

以貶之也

衛宣繼州吁暴亂之立不施德政固本恤民而

毒衆臨戎入人之國失君道矣書圍師入邲著其暴

也

家氏曰衛宣繼亂而立不能懲艾革弊以息民保國為事而輕動大衆以入人國書以貶之耳此入

邲入而弗有也十年齊鄭又入邲故知此入之弗有非其力之可以取而不取蓋懼強國來討故雖入之而不敢遂有之耳廬陵李氏曰邲之事書於經者四考其始末一入於衛再入於齊鄭既而降於齊又七十一年而奔魯春秋不復書矣夫以文昭之懋受甸伯之爵而迫脅於諸侯如此春秋抑強扶弱之書安得不重感乎齊鄭猶可也衛邲兄弟之國而若是甚矣臨川吳氏曰衛與邲皆文王之子所封邲乘亂侵衛已非禮衛又報復而復其國莒入向魯入極且不可況以師而入兄弟之國乎茅堂胡氏曰凡用兵將

尊師衆稱某帥師者言將與師輕重敵也將尊師少
稱將者其重在將也將卑師衆稱師者其重在師也
君將不言帥師者則以君為重此屬辭為例之體也
然立例為法其義深矣主將三軍之命不可不謹擇
也大衆有邦之本不可輕用也民之戴君其尊之如
父母君之視民其親之如子弟子弟之不先父母審
矣此立例為法之意矣○廬陵李氏曰帥師例胡氏
取公羊之說而又發書師之三例然後春秋之義明
甚何氏功惡有大小之說疏者曰將尊師衆而有功
小將卑師少而有功大將卑師少而無功為惡小將
尊師衆而無功為惡大蔡衡陳從王伐鄭稱人而行
義是其功太公孫敖救徐稱率師而無功是其惡大
雖亦可取然不可以遍通於諸例也

九月考仲子之宮

公羊傳考宮者何考猶入室也始祭仲子也桓未君則
曷為祭仲子隱為桓立故為桓祭其母也然則何言爾
成公意也穀梁傳考者何也考者成之也成之為夫人
也禮庶子為君為其母築宮使桓公主其祭也於子祭
於孫止仲子者惠公之母隱孫而脩之非禮也程子曰
諸侯無再娶仲子不得為夫人春秋之初尚以為疑故
別宮以祀之考始成而祀也書以見非禮問考仲子之
宮非與曰聖人之意又在下句見其初獻六羽也言初
獻則見前此八衍

考者始成而祀也

杜氏曰成宮安其主而祭之服虔曰宮廟初成祭之名為考

其

稱仲子者惠公欲以愛妾為夫人隱公欲以庶弟為

嫡子聖人以為諸侯不再娶於禮無二適

音

孟子入

惠公之廟仲子無祭享之所為去聲別立宮以祀之非

禮也

杜氏曰諸侯無二嫡惠公欲以仲子為夫人隱公成父之志為別立宮也家氏曰隱欲讓國於

桓故為其母立廟仲子之卒已久至是始立廟者隱欲以是見其讓國之志耳夫禮必庶子為君而後其母築宮其祭也又以公子主之君不親祭尊宗廟也今桓未為君而隱為之築宮以祭其母此名亂之道也宮廟有定制循其制之常不書非制之禮如是乎書若曰公子允之母非魯君所宜為之立廟也廬陵李氏曰妾廟側陳氏曰古者妾祔於妾祖姑無妾祖姑則易牲而祔於女君別廟非禮也穀梁曰禮庶子為君為其母築宮使公子主其祭於子祭於孫止何休曰禮妾廟子死則廢喪服小記曰慈母與妾母不世祭是也然則妾廟子死尚不祭

故因其來賁而正

名之曰仲子之賙因其考宮而正名之曰仲子之宮

而夫人衆妾之分定矣

汪氏曰不稱諡不稱夫人隱不稱小君則其為妾明矣

公攝讓之實辯矣

汪氏曰桓公非夫人則曰桓皆庶子隱長當立非攝也隱欲與桓乃

讓之也

桓公篡弑之罪昭矣

汪氏曰隱將讓桓而桓聽輦之譖以弑隱公非篡而

何

存則以氏繫姓以姓繫號沒則以諡繫號以姓繫

諡者夫人也

汪氏曰據文姜至自齊如齊及薨皆稱夫人姜氏葬稱小君文姜

存不

稱號沒不稱諡單舉姓字者妾也

汪氏曰諸侯妾母祇當以氏繫字魯

自成風而後妾母皆稱夫人稱小君稱諡惟定姒以哀未成君不稱夫人及小君然亦襲成風敬嬴齊婦

之例而稱諡矣夫人且不當別有諡而况妾乎

凡宮廟非志災失禮則不書

啖氏曰凡祭祀常事不書失禮及非常乃書汪氏曰穀梁云庶母築宮而君終則廢禮曰妾母不世祭乃庶子為君之禮也戴記稱妾祔於妾祖姑乃公子之為大夫士者之禮也若庶子未為君而祭其妾母則固無其禮也禮稱女君死則妾為女君之黨服攝女君則不為先女君之黨服所以防嫡妾之亂也孟子卒則聲子攝小君矣仲子先君之妾耳安可為之立宮乎隱公立宮以祭庶弟之母遂啟後世追尊妾母皆援春秋考宮之義聖人特書以著失禮之始厥後成風敬嬴定姒齊歸皆以妾母祔廟而不書矣凡經書宮廟若西宮新宮桓宮僖宮則以災而書作新宮合禮則不書也室屋壞則書新作世室合禮亦不書丹桓宮楹刻桓宮楠過侈非禮則書武宮煬宮親盡不當立則書取郕鼎納于太廟禘于太廟用致夫人

大事于太廟躋僖公有事于太廟仲遂卒猶繹非禮皆書凡易世立先君之廟得禮皆不書○劉氏曰穀梁曰考者成之也成之為夫人非也若成之為夫人經當曰考夫人子氏之宮今但曰仲子非夫人明矣廬陵李氏曰書宮例武煬言立此不言立者何氏以為武煬非禮故特書立此不言立者得變禮其說非是蓋因考宮而書則別立之罪自見矣

初獻六羽

左傳九月者仲子之宮將萬焉公問羽數於眾仲對曰天子用八諸侯用六大夫四士二夫舞所以節八音而行八風故自八以下公從之於是初獻六羽始用六佾也公羊傳初者何始也六羽者何舞也初獻六羽何以書譏何譏爾譏始僭諸公也六羽之為僭奈何天子八佾諸公六諸侯四諸公者何諸侯者何天子三公稱公

王者之後稱公其餘大國稱侯小國稱伯子男天子三公者何天子之相也天子之相則何以三自陝而東者周公主之自陝而西者名公主之一相處乎內始僭諸公昉於此乎前此矣前此則曷為始乎此僭諸公猶可言也僭天子不可言也穀梁傳初始也穀梁子曰舞夏天子八佾諸公六佾諸侯四佾初獻六羽始僭樂矣尸子曰舞夏自天子至諸侯皆用八佾初獻六羽始厲樂矣程子曰成王賜魯用天子禮樂祀周公後世遂羣廟皆用仲子別宮故不敢同羣廟而用六羽也書初獻見前此用八之僭也仲尼以魯之郊禘為周公之道衰用天子之禮樂祀周公成王之過也

初獻六羽者始用六佾也不謂之佾而曰羽者佾干羽之總稱也羽以象文德干以象武功婦人無武事

則獨奏文樂故謂之羽而不曰佾也

范氏曰佾之言列八人為列羽

翟雉之羽舞者所執人執一羽不言六佾言佾則千在其中杜氏曰每佾人數如其佾數汪氏曰武舞執千干楯也所以扞難文舞執羽翟羽有文也書言舞千羽于兩階蓋二者並用孔氏曰羽翳也山海經五采之鳥名翳蓋或翟或翳惟取其文耳佾者舞列之名則千羽皆在其中但言羽則舞千不與矣春宮樂師有羽舞有干舞箛師祭祀則鼓羽箛之舞司干祭祀舞者既陳則授舞器然則祭祀或文舞武舞並用或止用文舞而

初者事之始

邵子曰初者褒之以其舊僭八佾也汪氏曰

書洪範初一日五行易卦第一爻曰初善者復其初惡者變其初作事者必慎其初故初者肇事之端不可不審也
魯僭天子之禮樂舊矣是成王過賜而伯禽受

之非也用於太廟以祀周公已為非禮其後羣公皆

僭用焉

杜氏曰魯唯周公廟得用八而他公遂因仍僭而用之汪氏曰祭統成王追念周公所以

勲勞者而欲尊魯故賜以重祭八佾以舞大夏此天子之樂也明堂位成王以周公為有勲勞於天下命魯公世世祀周公以天子之禮樂使成王命魯有天子禮樂者以褒周公之德也今按劉氏意林謂魯惠公之世禮壞樂崩請于周天子命史角往自是魯始用天子禮樂夫齊桓晉文輔翼襄王其功甚大不過召伯賜命尹氏授策而已耳晉文請隧則曰王章也未有代德而有二王亦叔父之所惡也豈以魯惠無功於王而遽以天子之禮樂賜之耶以為惠公自僭則當時諸侯強盛惟吳楚無知僭稱王號桓文威行天下幾於改物然終身不敢用天子之禮孰謂惠公而敢僭之耶若曰惠公請于周平王亦未必從之也

程子朱子皆信戴記遷史之說其必有所見矣

仲子以別宮故不敢同羣廟

而降用六羽書初獻者明前此用八之僭也

汪氏曰言初獻

六羽善其復正張氏曰獻者不宜獻也書初以見八佾用於羣公之廟書獻以見六羽不當用於仲子之宮一言而盡魯僭禮之本末非聖人莫能脩謂此類也沙隨程氏曰獻六羽是以妾僭夫人也諸侯

僭於上大夫僭於下故其末流季氏八佾舞於庭而

三家者以雍徹上下無復辨矣

汪氏曰諸侯之大夫而僭天子之禮豈復

有上下之辨朱子曰使魯不會用天子之禮樂則三家雖欲僭無此樣子亦無緣見此等禮樂而用之

聖人因事而書所以正天下之大典

汪氏曰魯僭天子禮樂春秋因

事書之以著其罪諸侯六佾而魯僭八佾隱公以仲子別立宮當下於羣公之廟疑於羽數乃從衆仲而改用六羽蓋隱公之心若曰先公之廟可循舊用天子所賜之禮仲子別宮祇當用諸侯之禮而不知先君之妾不可與君同安可用諸侯之禮乎聖人書曰初獻一以嘉隱公復王制之舊一以著其崇寵妾之過也孔子之時季氏舞八佾則知隱公惟用六羽於仲子之宮而羣公仍僭八佾厥後成風敬嬴定姒齊歸皆以妾母用小君之禮則隱公為仲子立宮而獻六羽有以啟之也聖人書此固為隱公喜而亦深有遺憾云公穀皆云天子八佾諸公六佾諸侯四佾諸樂舞之數自上而下降殺以兩諸侯既降於諸公則諸伯當降於諸侯而用二佾矣子男復何所用乎況禮經所記廟制堂制衮旒席數五等諸侯皆同豈以舞佾而獨異其制乎尸子又謂天子諸侯皆用八佾初獻六羽始厲樂矣夫春秋諸侯僭侈循習為常魯

於郊神門觀皆不貶損何獨羽數而貶損乎且妾廟降於諸侯乃其常也春秋亦不書矣廬陵李氏曰書初例二初獻六羽復正之初也初稅畝變古之初也

邾人鄭人伐宋

左傳宋人取邾田邾人告于鄭曰請君釋憾於宋敝邑為道鄭人以王師會之伐宋入其郛以報東門之役宋人使來告命公聞其入郛也將救之問於使者曰師何及對曰未及國公怒乃止辭使者曰君命寡人同恤社稷之難今問諸使者曰師未及國非寡人之所敢知也程子曰先邾人為主也

按左氏宋人取邾田邾人告于鄭曰請君釋憾於宋敝邑為道則主兵者邾也故雖附庸小國而序乎鄭

之上

家氏曰邾序鄭上著其為兵首所以貶也或曰宋實啟釁而邾應之邾其無罪乎曰邾見侵於

宋當告之天王請之方伯聲其罪而治之不當問鄭宋之隙而偕鄭以伐宋因彼之憾復己之私春秋所不與也是故邾為首鄭次之鄭以伯爵之國而序乎邾之下亦所以貶也凡班序上下以

國之小大從禮之常也

茅堂胡氏曰諸侯序列以爵之尊卑則名立

而盟

會征伐以主者先因事之變也

汪氏曰會盟則先主會征伐則先主兵

然則衛州吁告於宋以伐鄭事與此同而聖人以宋

為主者何此春秋撥亂之大法也凡誅亂臣討賊者

必深絕其黨

茅堂胡氏曰兵者國之大事也春秋之所重故雖將卑師少亦書于策而曲直

之辭其文可見汪氏曰左傳云鄭人以王師會之伐宋入其郛而經序却為首不書王臣蓋鄭是時為王卿士故擅與天子鄉遂之兵非王室遣將故不書也

螟

音冥

蟲災始此公羊傳螟何以書記災也穀梁傳螟蟲災也甚則月不甚則時程子曰書螟書蟲皆為災也國之大

書
事故

蟲食苗心曰螟食葉曰螻

持音

食節曰賊食根曰蝻

莫侯

反
國以民為本民以食為天詩云上聲螟螻害稼也春

秋書螟記災也

薛氏曰異天之變也災人之害也賢君睹災變而恐懼脩省消災變之道

也朱子曰書山崩地震螽蟴之類知災異有所自致也

聖人以是為國之大事

也故書

家氏曰宇宙之內一事之違其常一物不得其所日星示異水旱螽蟴告災皆人君責也

故春秋變見於上必書災及於民亦必書示人君職分之當謹耳哀十二年冬螽注者歸過於司歷之失

閏此諛臣所以蔽災而託於聖人之言豈春秋書水旱螽蟴之旨哉汪氏曰春秋書螽災者十四書螽者

三而在隱公之世者二在莊公之世者一書螽者十而桓僖文襄四公之世各一宣公之世者三哀公之

世者三書螽生者一亦在宣公之世蓋宣公以獄兄得國而又改法稅畝重困農民故螽蟴水旱饑饉之

災比歲相仍猶不知恐懼脩省以消天變聖人備書為後鑒也

而近世王安石乃稱

為人牧者不必論奏災傷之事亦獨何哉甚矣其不

講於聖人之經以欺當年而誤天下與來世也

宋宗鑑

熙寧五年御史張商英言刑部立法應蝗蝻為害須俟其撲除盡淨方許以聞則陛下欲於此時恐懼脩省以上答天戒而下恤民隱亦晚矣王安石曰條貫已令轉運司申奏安撫司有何限合經制事却須要

管勾奏災傷狀作甚上笑

冬十有二月辛巳公子彊卒

彊苦侯反

左傳臧僖伯卒公曰叔父有憾於寡人寡人不敢忘葬之加一等穀梁傳隱不爵命大夫其曰公子彊何也先君之大夫也

按左氏臧僖伯卒

僖諡伯字汪氏曰僖伯以先公子公未賜族蓋左氏追稱氏如陳桓

未卒而稱陳桓公有寵於王高氏曰其子臧孫達公
嗣是為哀伯自是終春秋臧氏世預魯國之政

曰叔父有憾於寡人寡人不敢忘葬之加一等

汪氏曰葬

者臣子之事非公家所及故不書葬

以公羊三世考之則所傳聞之世

也

何氏曰所見之世謂昭定哀已與父時事也所聞之世謂文宣成襄王父時事也所傳聞之世謂隱

桓莊閔僖高祖曾祖時事也

而書日見恩禮之厚明矣公將如棠

觀魚者僖伯諫而不聽則稱疾不從可謂忠臣矣葬

之加一等夫是之謂稱

去聲汪氏曰宜也謂得賞善旌直之權衡

然隱公

不敢忘其忠而不能聽其言與郭公善

去聲

善而不能

用至於亡國一也其及宜矣

永嘉陳氏曰穀梁云隱不爵命大夫蓋謂隱攝

而非君也然其生也稱公侯段也稱薨魯之臣子皆以君待之矣非攝也豈有不爵命大夫乎彼見無駭之不稱公子求其說而不得故云爾

宋人伐鄭圍長葛

此書圍之始左傳以報入郕之役也公羊傳邑不言圍此其言圍何疆也穀梁傳伐國不言圍邑此其言圍何也久之也役不踰時戰不逐奔誅不填服苞人民毆牛馬曰侵斬樹木壞宮室曰伐程子曰伐國而圍邑肆其暴也

圍者環其城邑絕其往來之使禁其樵采之途城守

不下至於經年而不解

汪氏曰明年冬書取長葛既不稱侵伐又不繫鄭故知圍

經年也

誅亂臣討賊子可也長葛鄭邑何罪乎書圍於

此而書取於後宋人之惡彰矣

高氏曰圍人城邑者其兵必衆而稱人者

貶之也張氏曰宋殤以邾鄭伐已之故報怨於鄭聲其罪而圍其邑踰年乃取著其暴虐阻兵之甚也臨川吳氏曰前書莒人伐杞取牟婁一加兵即取其邑取之易也宋雖加兵於鄭之邑而取之難故圍之經年乃能取陳氏曰伐國不言圍邑自僖以前則書之僖十八年邢狄伐衛圍蒐圃不書至二十三年書齊侯伐宋圍緡二十六年書楚人伐宋圍緡之後皆不書矣春秋之初猶以圍邑為重也蜀杜氏曰春秋書圍四十四伐國而言圍者九此為之首書伐書圍書取惡之也廬陵李氏曰伐國圍邑四而有二例伐鄭

圍長葛伐宋圍緡皆著其暴也齊侯伐鄭圍新城則又以著其無貪地之心辭同而義異矣或曰外伐之圍邑僅四魯一國而被伐圍邑亦四何也趙子曰內事詳故悉書外事不告則不書矣

甲桓王六年齊僖十四晉哀侯光元年衛宣二蔡宣三子三年鄭莊二十七曹桓四十陳桓二十八

杞武三十四宋殤三秦文四十九楚武二十四

春鄭人來輸平

輸左作渝

左傳更成也公羊傳輸平者何輸平猶墮成也何言乎墮成敗其成也曰吾成敗矣吾與鄭人未有成也吾與鄭人則曷為未有成狐壤之戰隱公獲焉然則何以不言戰諱獲也穀梁傳輸者墮也平之為言以道成也來輸平者不果成也程子曰魯與鄭舊脩好既而迫於宋衛遂與之同伐鄭故鄭來絕交輸平變其平也匹夫且

不肯失信於人為國君
而負約可羞之甚也

輸者納也平者成也

沙隨程氏曰輸如呂刑輸而孚之輸我無欲平之意而鄭輸其

平於我臨川吳氏曰來者彼來求我非我往求彼也輸謂輸寫其情平謂兩國昔有忿怨如地之不平今悉剗削而使之平也輸平猶曰納款也上年魯嘗同宋衛伐鄭今鄭釋其怨而求和於魯故曰來輸平杜氏曰和而鄭人曷為納成於魯以利相結解怨釋仇不盟曰平

離魯宋之黨也公之未立與鄭人戰于狐壤止焉

汪氏

曰內諱獲故言止

元年及宋盟于宿四年遇于清其秋會師

伐鄭即宋魯為黨與鄭有舊怨明矣

孫氏曰鄭來輸成於我平四年

翬會諸侯伐鄭之怨也

五年鄭人伐宋入其郛宋來告命魯欲

救之使者失辭公怒而止其冬宋人伐鄭圍長葛鄭

伯知其適有用間可乘之隙也是以來納成耳然則

善之乎曰平者解怨釋仇固所善也輸平者以利相

結則貶矣

高氏曰曰來輸必有挾也汪氏曰經書平者凡六惟此言輸平輸之為言必有貨賂

行乎其間而非虛言求平矣平乃鄭志而非魯志苟不以利啗魯則魯必不從也

曷為知其

相結之以利也後此鄭伯使宛來歸枋而魯入其地

會鄭人伐宋得郛及防而魯又取其二邑是知輸平

者以利相結乃貶之也諸侯脩睦以蕃王室所主者
義爾苟為以利使為人臣者懷利以事其君為人子
者懷利以事其父為人弟者懷利以事其兄諸侯必
曰何以利吾國大夫必曰何以利吾家士庶人必曰
何以利吾身上下交征利不至於篡弑奪攘則不厭
矣故特稱輸平以明有國者必正其義不謀其利杜

亡國敗家之本也

太史公曰利誠亂之始也夫子罕言利常防其源也張氏曰鄭莊之

納平為合黨敵宋計是以不憚屈已請和於魯繼以納枋而未即求許所以為敗宋入許之權與魯隱亦

入其術中而不悟也永嘉呂氏曰言來輸則有自屈損之意鄭豈誠敬魯哉亦豈誠畏魯哉亦豈誠欲與魯釋其舊憾而為玉帛之好哉特以宋魯方合而幸其有可離之隙於是屈損以求成耳陳氏曰春秋之初魯宋衛陳蔡為一黨齊鄭為一黨今鄭先來與魯平就合齊魯之交自此以後魯合於齊鄭而離宋魯之交矣平不書必關於天下之故而後書明年宋陳及鄭平宣七年鄭及晉平文十六年及齊平襄二十年及莒平哀八年及齊平皆不書書鄭輸平以志諸侯之合書及鄭平以志諸侯之散是春秋之所終始也○劉氏曰公羊謂敗吾成穀梁謂不果成皆非也平者兩國約不相背云爾四年伐鄭平絕可知安有鄭人又來請絕前平乎左氏作渝平蓋字誤朱子曰鄭人來渝平渝變也蓋魯先與宋好鄭人却來渝平謂變渝舊盟以從新好也公穀作輸平胡文定謂以物而求平也恐未是但言輸則渝之義自在其中如

秦詛楚文云變輸盟刺若字義則是如此其文意則只是渝字廬陵李氏曰輸平三傳不同公羊以為此即言狐壤之戰諱敗獲而書輸平已為無據穀梁以為魯舊與鄭平至此而絕又與後日歸祊會鄭之事不合要之皆非的論胡氏魯與鄭有舊怨之說本杜氏納成之說本臨江劉氏蓋鄭莊之納成非有講信脩睦之心而深為合黨敵宋之計是以不憚屈已求和於魯魯亦溺於利欲之私陷其術中而不悟是以盟宿遇清之好一變而為取郛取防之仇矣又曰平例五胡氏曰輸平者惡鄭之以利相結也宋楚平皆書人者惡華元子反之擅也暨齊平者惡魯之附荆楚而得平也及齊及鄭平者惡魯之侵犯大國而急於平也此說固然然春秋之平而不書者多矣何獨書此要必兼陳氏之說方備外平莒及邾不過平怨之平

爾

附錄

左傳翼九宗五正項父之子嘉父逆晉侯于隨納諸郢晉人謂之郢侯

夏五月辛酉公會齊侯盟于艾

艾五蓋反

此齊魯交盟之始左傳夏盟于艾始平于齊也杜氏曰春秋前魯與齊不平今棄惡結好臨川吳氏曰前此魯未嘗與齊交因鄭輸平之後而公始與齊盟蓋皆鄭莊之謀也陳氏曰春秋之初宋魯衛陳蔡一黨也齊鄭一黨也於是鄭始平魯鄭方交惡於王而亟平齊魯將以合諸侯焉爾廬陵李氏曰齊大師之後受地于王方百里者五東方之國莫大焉自師尚父十二世至釐公已稱東州之小伯然是時宋亦以先代之後爵居上公方與魯為好未可間也故假鄭以求魯魯一溺於輸平之利再徇於于艾之歛三誘於枋田之歸四惑於不王之告而魯於齊鄭之交固矣他日齊伯之成謂不始此故陳氏之說不為無見又曰書公會齊侯盟者四艾齊僖

小伯之初也。柯與扈齊桓圖伯之初也。于黃齊景爭伯之初也。春秋皆書會明齊志也。何獨不書日信齊桓也。汪氏曰：宋殤既合五國之師伐鄭，又出師圍邑，經年而取之，鄭之怨宋深矣。去年與邾伐宋，未足以釋其怨，故持平齊魯以爲他日伐宋之謀。魯與齊盟而曰鄭莊合齊魯者，以三年齊鄭盟石門，知齊鄭合黨故也。盟不書及而書會，則非魯志而齊欲爲盟也。書盟于艾，著齊僖之伯，之始書盟于黃，著齊景爭伯之終前乎于艾，雖盟石門，然未與魯平，則黨與未盛也。後乎于黃，雖次垂蔭，會牽會洮，次蕞蔭伐晉伐宋而無盟矣。凡書盟皆春秋所惡比事以觀而世變可知也。

附錄

左傳五月庚申鄭伯侵陳大獲往歲鄭伯請成于陳陳侯不許五父諫曰親仁善鄰國之寶也

君其許鄭陳侯曰宋衛實難鄭何能爲遂不許君子曰善不可失惡不可長其陳桓公之謂乎長惡不悛

徒自及也雖欲救之其將能乎商書曰惡之易也如火之燎于原不可嚮邇其猶可撲滅周任有言曰為國家者見惡如農夫之務去草焉芟夷蘊崇之絕其本根勿使能殖則善者信矣

秋七月

公羊傳此無事何以書春秋雖無事首時過則何無事書春秋編年四時具然後為年程子曰無事書首月天時王月備而後成歲也

四德備而後為乾故易曰乾元亨利貞一德不備則乾道熄矣四時具而後成歲故春秋雖無事首時過則書一時不具則歲功虧矣

何氏曰歷一時無事則書其始月春以正月為

始夏以四月為始秋以七月為始冬以十月為始明
王者當奉順四時之正也有事不月者人道正則天
道正矣孔氏曰年有四時交錯互舉以為
史記之名言春足以兼夏言秋足以見冬既書時又

書月者時天時也月王月也書時又書月見天人之

理合也易不云乎君子行此四德者故曰乾元亨利

貞

汪氏曰乾健也天之德也天以至健故能運四德
於四時君子以至健故能體四德於一身聖人以

至健故能行四德於兩儀之間以參天地而贊化育
元者物之始於時為春其在人則為仁其發則惻隱
之情而得天地生物之心以為心者也月令天子賞
公卿大夫於朝命相布德和令行慶施惠下及兆民
是體乾之元亨者物之通於時為夏其在人則為禮
其發則辭讓之情而所以品節乎親親仁民愛物之

等差者也月令天子賞封諸侯慶賜遂行無不欣說
命太尉贊傑俊遂賢良行爵出祿必當其位是體乾
之亨利者物之遂於時為秋其在人則為義其發則
羞惡之情而所以制斷事物各得其宜者也月令天
子命將帥選士厲兵以征不義詰誅暴慢以明好惡
命有司脩法制戮有罪嚴斷刑是體乾之利貞者物
之成於時為冬其在人則為智其發則是非之情而
所以分別事理以宰萬物者也月令天子察阿黨使
罪無有掩蔽功有不當必行其罪以窮其情固封疆
備邊境命將講武飭戎事是體乾之貞春秋於每年
備四時明人君當奉若天道體乾之四德首時必書
月明人君當謹守王度奉天子之正朔與其法制禁
令王者承天而禮樂征伐行於天下諸侯
奉王而德刑賞罰施於國中其理一也

若夫上下

異致天人殊觀聖學不傳而春秋之義隱矣

汪氏曰
聖人致

中和而天地位萬物育自聖人以下不能體乾之四德毫釐有差則天壤易位一物不得其所而天變應之宋神宗時王安石言水旱常數堯湯所不免王珪言天象既如此必至於用兵亦天數也此皆人臣不能諫人君敬省以答天戒蓋不通春秋之義而以為天人異致故也

冬宋人取長葛

左傳作秋

公羊傳外取邑不書此何以書久也穀梁傳外取邑不志此其志何久之也程子曰宋人之圍長葛歲且周矣其虐民無道之甚而天子弗治方伯弗征鄭視其民之危困而弗能保有赴訴卒喪其邑皆罪也宋之強取不可勝誅矣何氏曰不繫鄭舉代者因上伐圍取也

宋人恃彊圍邑久役大衆取非所有其罪著矣

汪氏曰彼

此皆列國而伐之以圍其邑恃強也圍之期年是久役也環而攻之是用大衆也鄭邑而已取之是取非所有也直書

在王朝不能施九伐之威

周禮大司馬以九伐之法

而罪自見正邦國馮弱犯寡則責之賊賢害民則伐之暴內陵外則壇之野荒民散則削之負固不服則侵之賊殺其親則正之放弑其君則殘之犯令

在列國不能脩

連帥之職

禮記王制千里之外設方伯五國以為屬屬有長十國以為連連有帥三十國以為

卒卒有正二百一十國以為州州有伯

鄭人土地天子所命先祖所受

不能保有而失之是上無天王下無方伯而鄭亦無君也宋人強取以王法言不可勝誅以天理言不善

之積著矣初穆公屬

章欲反

國於與夷使其子馮出居

於鄭殤公既立忌馮而伐鄭不亦逆天理乎春秋序

宋主兵以殤公之罪重也明年鄭人伐宋序邾為首

以鄭伯之罪輕也至是宋又舉兵伐鄭而圍其邑肆

行暴虐不善之積已著而不可解矣其見弑於亂臣

豈一朝一夕之故哉凡此類皆直書於策按其行事

而善惡之應

去聲

可考而知天理之不誣者也

張氏曰宋自去


年圍長葛經年不解志在必取鄭莊不求保其土地
人民及交結於魯為後日報復之計而委長葛於宋

宋瑒雖若得志而後日終受鄭莊報復感國喪師以
及其身汪氏曰或云文定言善惡之應與佛氏所謂
果報者相似非也易文言於坤之初六曰積善之家
必有餘慶積不善之家必有餘殃於噬嗑之上九曰
善不積不足以成名惡不積不足以滅身小人以小
善為無益而弗為也以小惡為無傷而不去也故惡
積而不可掩罪大而不可解曾子曰出乎爾反乎爾
天道好還無毫髮爽此乃福善禍淫必然之理也若
果報之說謂今世為人後世為異物負怨於陽明之
界而取償於幽陰之府豈有是理也哉○劉氏曰左
氏作秋取長葛杜氏云冬告非也史之記事雖據赴
告至其月日猶依先後次序假令以二月出師適時
來告猶言二月也豈據告時紀之於夏乎左氏雖采
當時諸國史策有用夏正者有用周正者故經云冬
傳云
秋也

附錄

左傳冬京師來告饑公為之請糴于宋衛齊鄭禮也○鄭伯如周始朝桓王也王不禮焉周桓

公告於王曰我周之東遷晉鄭焉依焉鄭以勸來者猶懼不訖况不禮焉鄭不來矣



春秋大全卷二